

se retirerent vers le pays des Abnaquiois, les autres au pays des Hiroquois, & vne partie vers les Hurons mesmes, & s'ynifans avec eux; & voilà comme cette Isle s'est renduë deserte. Mon grand-pere, disoit vn vieillard, a cultiué la terre en ce lieu-cy: les bleds d'Inde y venoient tres-bien, le Soleil y est tres-bon: & prenant de la terre avec ses mains; Regardez, disoit il, la bonté de la terre, elle est tres-excellente. On ne s'oublia pas là dessus de les inuiter, & de les presser de retourner en leur pays, & de leur declarer le dessein des Capitaines, qui enuoient icy du monde pour les secourir, leur promettant qu'on les aideroit à bastir de petites demeures, & à défricher la terre dont ils ont perdu l'habitude. S'estans quasi rendus errans de sedentaires qu'ils estoient, ils promirent qu'ils traitteroient de cét affaire en leur pays. L'vn d'eux nommé Atcheast, pere du petit Ioseph, homme qui paroist paisible, & qui a fait rencontre d'vne femme aussi posée que luy, asseura qu'il retourneroit au Printemps avec toute sa famille. Les autres estoient dans la mesme volonté, mais ils n'oserent iamais donner parole de s'arrester icy pour défricher la terre, la